

摘藻堂四庫全書薈要

集部

欽定四庫全書薈要卷一萬六千一百二十九

集部

陵川集卷十三

元 郝經 撰

律詩

秋興五首

風振長天秋氣豪
幽人興與雪山高
霜纏短褐歌商頌
月滿空庭讀楚騷
萬事已應隨弊俗
一身寧忍墮塵牢
會須散髮滄溟上
鞭擊魚龍舞石濤

世事雖窮道不窮金聲猶振魯王宮
看書極探天人理
下筆全侔造化功
未灑後塵心有贅
忽驚前哲坐生風
六經依舊垂天地
千載秦灰散劫空

沙冷雲平塞外天
霜風掣箭射幽燕
羣狐蹀血濡腥尾
一鵲搏空弄老拳
白玉樓成賀安在
黃金臺廢隗猶賢
翩翩精衛休填海
驅石秦人已斷鞭

永夜漫漫苦飯牛
北溟誰下釣鰲鉤
拘雲琢句鬼神泣
倚劍長歌天地愁
日暖桃源秦世外
月明蘭國楚江頭

但能握節終吾事絕食猶輕漢五侯

萬里長風掃陣雲浩歌一曲倒清樽昔人猶有未埋骨
遽世難招不返魂陰沴豈能昏日月濁河難使貫乾坤
皇天不許中州靜夜夜長庚出薊門

寓興

實學湮沉偽學張四科一併入文章詞源更不窮西漢
詩律惟知效晚唐風雅義迷元氣死天人理昧正心亡
何當倒換銀河水淨洗雲孫織錦裳

李淑玉送醉梨

李氏家梨點漆光
蟄龍遺卵結冰霜
香中風味爛中得
皮裏陽秋凍裏藏
破酒滿盤烏玉顆
醒心一掬粉紅漿
燕南奇士共奇果
不獨張公擅洛陽

雪意

陽谷初冰冽曉霾
瑤花一夕滿瑤臺
雲飛海嶽寒難吐
風振堪輿凍不開
秀魄暗成冰井月
冷魂潛入楚江梅
梁園此日多豪俊
濯濯無因展異才

晚晴登西臺

電明雲黑轉驚雷
忽送諸山暮雨來
萬騎蹴風颺陣駭
六鰲噴海漲天開
無情漫作陸地浪
有意不洗中心埃
落日明霞照湖水
一天爽氣上高臺

呈王內翰

霜落雲枯秋盡時
翰林遺得桂林枝
春風久已歸桃李
劫火從渠照虎貌
白髮操戈浮世在
赤心傾蓋幾人知
壺中有酒無天地
醉後休歌貝錦詩

送陵川魏夢臣

太行一脊壯中州上有吾家最上頭蓬鬢他鄉淹歲月
錦衣何日拜松楸塵埃滿面將何往羽翼生心漫起愁
聞說棣華堂尚在紫荊花老鷓鴣羞

南樓書懷贈趙丈仁甫

慘澹風雲鷗鷺洲蹉跎歲月仲宣樓從渠得失兩端了
不媿乾坤萬事休往行前言祇自省樂天知命復何憂
此身難著人間世只合長歌老飯牛

送仁甫丈還燕

一鞭天地起孤愁，高戴南冠賦遠遊。
濟瀆醉探窺海眼，岱宗闊步望吳頭。
唐虞問學傳千古，伊洛波瀾浸九州。
七十餘君皆不遇，却攜漢月渡瀟溝。

送高聖舉之關西

碧落心期已自通，滿襟霜月又相同。
斯文不墜浮雲外，元氣常存劫火中。
太華峯頭老秋色，銅駝陌上舊春風。
終當對此一樽酒，豈限秦關西與東。

哀王子正

鹿去中州道不行先生今日死猶生長鯨萬里朔風急

獨鶴一天秋月明擬見斯文還太極

時方作太極書院未畢

遽收

浩氣反元精世無程邵知音少雲黯燕山恨不平

追挽楊文獻公二首

九龍猶未復金源柱石儒臣不假年社稷隕靈輿廢定
圭璋無玷死生全筆頭黼黻能華國掌上星辰解補天
景畧格言今在耳空令有識淚如泉

晚進無由拜搢紳
空將行錄問前津
身兼達德智仁勇
學貫三才天地人
月落丹山嗟鳳鳥
風悲大野哭麒麟
文章從此無公論
安得餘波灑後塵

送董巨源

錯落霜花季子裘
茫茫何處是西周
乾坤破碎無元氣
歲月蹉跎漫客愁
舉世橫身歸虎口
幾人懷策射龍頭
相逢不得從容地
空著長歌慰遠遊

挽喬侯

挾槩歸來鬢未霜便如玉翦卧頻陽風雲墜地空黃土
劒甲埋光慘白楊壯節固應書北闕英名更好刻西廊
傳家有子無遺恨珠樹蘭花滿玉堂

老馬

百戰歸來力不任消磨神駿老駸駸垂頭自惜千金骨
伏櫪仍存萬里心歲月淹留官路杳風塵荏苒塞垣深
短歌聲斷銀壺缺常記當年烈士吟

詠史

八朝高祖擅英聲盡以姦雄篡奪成曹魏規模為故事
帝堯禪讓竟虛名貪夫眩篋盜仁義豎子欺人弄甲兵
天下區區幾千祀誰能端肯為蒼生

壽毛德義

振落紛華別得天誦詩學道便超然黃花明月琴三弄
綠竹清風易一編本與聖賢相對偶却教塵土強拘攣
他年看取騎鯨去搖曳長裾入紫烟

題楊之美尚書寄王運使守太原書後

憶昔風塵暗兩京北門此日賴真卿乾坤翻覆見忠節
臣子危亡置死生一柱數年支大廈孤軍千里重長城
尺書便是中丞傳讀者猶能感義聲

哭高監察

問學淵源筭畧長中樞近右轉臺郎繡衣春照金宮日
白筆寒生玉殿霜亡國失身雖共苦無兒死客獨堪傷
摩挲翠琰徐河道駐馬西風淚幾行

先生諱嶷字士美
遂州人以才幹精

絕拔為樞密院都事學紆純正轉監察御史金亡入燕
喪子感疾而卒居順天嘗語僕以讀書作文法故其卒

賦詩以哭之今順天北徐河橋上修橋碑先生之父都轉運使之文也故及之

讀昭烈皇帝紀

誓將餘燼熾高光誰意區區竟蜀亡三顧雄圖起諸葛
一生遺恨逐劉璋吞吳絕援誠無策為弟誅仇義不亡
可惜後人私漢統周文孰與漢中王

南堂即事

長夏禪房絕點埃鬱蒸襟袖迥然開半軒流水移天去
滿榻雄風送雨來不記閒愁千萬種有時清唱兩三杯

輕鷗也自知人意浮入驚波却便回

大宛二馬

天廡所有詔
錫張蔡公

二馬飄飄萬里來玉花蕭颯上金臺風生兩耳雲霄近
電掣雙瞳日月開渥水虎文連殺氣大宛龍種絕氛埃
將軍正欲成勲業看汝驍騰展驥才

落花

彩雲紅雨暗長門翡翠枝餘萼綠痕桃李東風蝴蝶夢
關山明月杜鵑魂玉欄烟冷空千樹金谷香銷漫一樽

狼藉滿庭君莫掃且留春色到黃昏

哭魏先生

臨危正色義巍然曾叱三軍誚武仙
赤子共知歸大老晚生獨喜見先賢
鳳鸞重赴丘園詔鬼蜮潛生李郭船
高棟傾摧更誰屋衣冠苦淚欲平天

挽劉善甫

葱葱玉樹照清秋蹭蹬羣倫正黑頭
方以孝廉升茂等便能籌策佐賢侯
氣凌天宇虹千丈怨入東風土一丘

寂寞神交與英契幾回中夜淚橫流

挽賈叔儀

把臂論交氣吐霓青天白日快襟期誰知半夜驚鸞去
漫使秋殘獨鶴悲劫火只燒希世寶惡風偏損出林枝
玉昆新有池塘句夢斷空看墮淚詩

哭祁陽賈侯

萬卷嶢雲慘六經三千拊髀惜生靈地維斷絕翻河海
天柱傾摧變日星相印不交虛左揆袞衣忽斂閑幽局

恩門知己將何報
淚洗貞珉刻墓銘

哭蕭侯孟圭

譙都狠蠹致中傷
毒手陰謀果扼吭
方喜明時見麟鳳
忽驚平地碎圭璋
人心甚海誰能測
天道如弓不可量
為告遺孤休舐血
玉壺永鑒有賢王

挽劉房山

節鉞盧龍十令公
紫髯如戟氣如虹
半生笑殺春閨月
一夜歌殘玉樹風
義獻典刑存筆外
遼金興廢列胸中

飄零竟向梁園死
苦淚空隨汴水東

題李轉運碑後

宣政宵人禍
搢紳先生道義獨能存
恨身不入蘇黃黨
此足可登童蔡門
賴有高文見完節
惜無佳語為招魂
屠龍大筆神明護
滄海遺珠在後昆

次韻答王國範

薄寒孤影澹黃昏
步出空齋自掩門
霜落池萍清見底
風凋庭樹靜歸根
天高雁去人千里
江濶鳥驚月一痕

兩國音塵俱斷絕幾年懷抱與誰論

丙寅新館重九

幾度重陽雜酒蛙舟中一夜總仇家半囚半客儀真館
不死不生揚子衙巖桂渾疑是楓葉牡丹誰使作黃花
強將瓊露澆斜日萬里西風萬里霞

是日伴使送木犀一瓶牡丹菊一本

故云

丁卯春日夜飲見月

新年新月照愁人白髮新添愁更新擬著長鞭遊海外

豈期孤劍坐江濱
醉殘蠟炬前冬酒
開盡梅花今夜春
自古行藏有天命
不須兒女淚霑巾

雨中飲臘封瓊露

簷溜琅琅戛玉繩
陰氛鬱鬱釀炎蒸
江湖不見繫書雁
風雨偏驚墮網鷹
天道本來愁似海
人生安得酒如澗
臘封賴有瓊花在
痛飲從渠變谷陵

修易外傳太極演

暮四朝三等賦狙
斗升幸得活枯魚
深庭寂寂都忘世

長日沉沉且著書根本還將太極演規模直向先天初
興來徑著江濡筆事去從渠雪滿梳

贈馬德璘

從君躍馬入長途樽酒風雲日便疎白壁暗投皆若此
赤心知己更誰歟不能北闕紆奇策甘向南山守敝廬
抱膝長吟意蕭索半生辜負五車書

靜香亭二首

南風吹綠滿庭槐門巷翛然絕點埃紅玉生烟塵世隔

錦幃遮日洞天開
鶯知好客飛無語
蜨為新花去復來
好酌生前無限酒
浩歌長醉亂霞堆

小山曲檻映回廊
別有一天深處藏
人物風流還似晉
衣冠儒雅尚如唐
四圍紅錦香風軟
滿地綠陰清晝長

坐久杳然忘世味
碧雲高興欲飛揚

燕自兩河之戰遂
非唐有荐罹遼金

幾四百年然而不漸宣政
桃靡之化豪勁任俠渾厚敦
雅猶有唐之遺風焉故是詩有衣冠儒雅尚如唐之句

題涿州昭烈皇帝廟

興王百折似高皇
垂老纔能據一方
鄴下只知移漢鼎

江東不肯對劉郎
千年生長村猶在
三代君臣道未忘
涿水都為永安淚
子規啼血怨樓桑

衛南感

衛北傳聞卷甲趨
衛南誰意却南驅
百年歷數雖當盡
孤注乾坤便可輸
漢割鴻溝還鬪楚
蜀亡江表益征吳
兵家勝敗尋常事
萬折彌堅是丈夫

靈巖道中

輕騎長鞭踏老埃
蕭蕭靈爽氣動靈臺
霜餘水落三秋盡

日照扶桑半夜開袖裏還攜泰山去筆頭又卷東海來
臨風悵望有所憶魯連安期安在哉

金線泉

不著靈犀水自分輕金一縷見天根飛來寒電空留影
消盡春冰尚有痕亂劃波心還便續醉探泉眼不能渾
冥冥化窟呼真宰此理須當與細論

過臨淄

區宇沉雄海岱間漢家曾著此秦關風煙老樹千年國

金碧斜陽一片山管仲霸圖無謂小魯連高義孰能攀
半生失意仍漂泊嘆舊懷賢益厚顏

竹溪

竹溪無竹背陰崖澗石參差漬老苔六逸於今竟何往
四賢不復更誰來葉邊重覓懷英畫天末空思太白才
為向居民問遺跡路南祇有看山臺

泰安文廟有羊祜
孫明復石介党世

傑四
賢祠

哀李文甫

亂來嗟嘆子矜風英俊無聊坐死窮數冊舊書塵滿甌
一間空屋淚霑蓬最憐短折拋嫠婦忍見咿嚶哭駢童
收拾同門二三子挽輿權厝草岡東

文甫保州清苑人其父祖皆進士

為顯宦金亡以孤童歸鄉里教授句讀安于貧窶年三十一歲疾卒經嘗與之遊故賦是詩以哀之

哭亡友孟振文

簪笏箕裘出鼎臆泥途誰使擲瓊琚負骸千里還墟墓
泣血三年殞敝廬間說朱衣畏金石豈期白粥亦癰疽
羈孤撩亂號嫠婦淚浸牀頭幾冊書

振文順天軍節度使某之孫故須城

令某之子轉運使李公特立之甥也幼孤三十年後始
于河南登封求得其父遺櫬負歸甫葬于清苑先塋而
喪其母母喪適終
而疽發背卒故云

曉渡澹河

旌旗斷續出林巒部曲喧逐過石灘殘月沒時愁地險
宿雲收處覺天寬自知不武還為將漫使閒身也屬官
落盡黃榆秋色老楚山青曉石樓寒

營獨山谷

秋風獵獵建牙旗月澹昏黃馬不嘶區脫定時林影黑

邏兵行處艸聲低豺狼遠跡終宵遁
烏鵲驚飛到曉啼
中夜幾迴還自惜缺壺歌罷意淒迷

德安道中聞大軍渡江

萬騎吞江勢欲乾江神一夜到狂瀾
縱橫奇計山河壯
霹靂先聲草木寒下令推恩今始見存心不殺古猶難
天將海宇都平蕩休道東南有謝安

公夫人毛氏挽章

雍容二十四城春叶贊元戎作虎臣
家法自傳王令尹

流風復見謝夫人種香忽去花辭樹秋月俄空鏡掩塵
最苦一年門下客不能執紼在江濱

孟少保後園四題

芙蓉

池館無人花正愁仙家城郭楚江頭一簾斜日錦雲晚
萬里西風紅露秋深院周圍情脉脉小山側畔思悠悠
祇應來歲蓬蒿底埋沒兵塵取次休

木犀

湖玉山前綠玉房靈犀幾點透心香麝塵和露花間結
金粟嫌風葉底藏寂寞生情動騷客殷勤通信與春娘
短襟翠袖偏能惜戴了還看意緒長

山茶

雪塢欹斜綠葉稀梅邊竹底弄嬌姿小山曲檻偏宜著
飛蝶狂蜂總不知秦樹怨離拋翡翠漢宮愁絕冷胭脂
內家最愛常留得生色屏風有數枝

瑞香

羽葆層層擁細花
甲梅斜映隔山茶
兩三叢裏氤氲氣
數百年來富貴家
雕玉香濃團瑞雪
翠翹春暖插輕霞
主人一去無消息
庭戶蕭疎落晚鴉

題汶陽王太師彥章廟

不許乾坤屬李唐
孤軍直與決存亡
大梁僅得延三日
匹馬猶能敵五王
誰意人間有馮道
幸因身後遇歐陽
千年豹死留皮在
破冢風雲繞鐵槍

晚登徐州黃樓

人物河山自古雄，郡人猶說大蘇公。
黃樓去後風波惡，赤壁歸來文字工。
戲馬尚能存壯觀，沐猴且莫笑重瞳。
我來慷慨懷今昔，樽酒超超駐晚風。

題留城留侯廟

龍蛇繞亂出氛埃，隆準相逢帝業開。
三世相韓攜劍起，一言平楚據鞍回。
掃除亂畧伊周輩，駕馭英雄管樂才。
崔浩張賓是何者，敢將驥尾比駑駘。

宿州夜雨

飛電穿窻滿室光却從陡黑見昏黃雷霆半夜翻龍窟
風雨終宵撼客牀塞上詩懷尤索莫天涯壯氣獨昂藏
星麾何日平康了兩國長令似一王

震南樓

危樓雄塵楚氛收緩帶輕裘日燕游赤羽萬夫開虎幕
黃流一曲枕鰲頭天高樹老關河暮水落雲枯澤國秋
此地誰教限南北蒼茫極目使人愁

以三弟庸將別憶二弟彞

西風木葉下湘潭鄉思離愁兩不堪二弟分襟向河朔
一身持節使江南斷鴻噓噓催秋別疎雨零零梗夜談
莫為他鄉重懷憶要將忠義麈烟嵐

沙洲夜泊

一來駐泊便淹旬洲渚人家雁鷺村滿地月明疑白晝
半帆烟影易黃昏天連平楚無邊濶河入長淮徹底渾
夷甫諸人憑寄語莫教石勒上東門

九月晦盱眙南為何待制壽

雲國回春事亦難每將和議動龍顏
不辭溟北三千里喜見淮南第一山
總謂豚魚知信使誰言虎豹守天關
先生此舉真豪傑鶴髮遨遊二帝間

奉和詳議叔蠟梅之什

蠟顆含春色更嬌物窮宜著點枯條
日融蜂翅黃將破雪壓檀心紫欲消
驛使最憐和竹把野人不惜並薪燒
何當走馬燕南道管領東風玉燭調

月丹

小艇移來江漲橋盤盤矮矮格仍嬌丹霞皺月瑠紅玉
香霧凝春翦絳綃一種是花偏富貴三冬無物比妖嬈

廣寒記憶曾攀折滿殿光搖照紫霄

王承宣致月丹一本云山茶大者曰

月丹又大者曰照殿紅故為賦此

館中書懷

一夜風濤洶客牀覺來無處問行藏頭皮新起粼粼雪
鬢角潛生短短霜李順色藏情已露王驩朝暮意難量
事成却被庸人擾心緒和梅也不香

劉房山方鏡二首

銅老寒芒欲動搖
斬然主角背鸞翹
四邊蝕却月猶在
一段裁成冰不消
挂向霜臺空耿耿
照來蓬鬢漫蕭蕭
好將物鑑為人鑑
圓行圓幾滿市朝

端瑩無塵電影飄
先生心印見秋毫
冰池落手洞庭小
玉井涵天太華高
物外將迎何足數
世間妍醜莫能逃
開奩一照還驚掩
疑有蒼虬噴雪濤

伴使秦文舉欲入維揚故賦詩以見意

東風吹落瓊花雨
南浦潛生荔子烟
夜久有懷聞獨鶴
春歸無語怨啼鶻
天沉海底涵金鎖
日隱鰲頭頓玉鞭
千尺絲綸萬年井
文園消渴竟誰憐

芍藥

王承宣送楊
州芍藥數本

夜來風雨洗殘春
芍藥還開春又新
入座忽驚持酒客
舉杯先酌送花人
烟輕雪膩丰容質
露重霞香婀娜身
鐵石肝腸總銷鑠
都將軟語說風神

瓊花

淮南江北春三月天上人間玉一株有地欲移移不得
見花方落落還無冰蕤膩碧開香雪金粟銜黃簇藥珠
間說隋家自亡國莫將詩句重相誣

館中書懷

星麾留滯楚江邊葉落樽空又一年兀坐政如游黑海
舉頭時復見青天拘同羑里難重易拙甚揚雄愧草玄
間說長歌猶慟哭慰愁賴得有詩篇

晚步

花落深庭步晚風雨苔生綠上幽叢黃鸝隔葉啼巖桂
翠碧攀枝琢海紅靜裏細吟詩有趣閒中遐想事無窮
江雲不定生愁思白疊為鱗散遠空

為劉詳議壽

鶴髮垂肩雪滿鬚故鄉耆德更誰如風流杜牧心尤壯
湖海元龍氣不除白酒芙蓉秋爛熳青山桑梓日蕭疎
去年淮上今江上安得稱觴向敝廬

曉起

屠龍心事碧雲重卧誦離騷嘆我儂墜甌幾回傷往事
斷蓬何處著孤蹤鴈啼揚子江心月風遮金山寺裏鐘
喚起小童添半臂且乘曉露看芙蓉

湯計議生朝

一夜芙蓉著早霜江中吹浪到中堂兩朝和氣回春色
百萬生靈入壽觴傾蓋便能知肺腑舉杯時復露衷腸
靈椿未老多丹桂今日燕山竇十郎

湯時年四十餘一
子請舉一知無錫

縣二補太
學上舍

生朝祭先有感

金橘堆盤荔子丹
瓊花滿萼熟沉山
風生香案空遙拜
月掩重門尚未還
目斷松楸心耿耿
氣填胸臆淚潛潛
三冬又盡三年數
兩國無成兩鬢斑

先大夫忌日

墨經歸來草滿墳
擬將還葬奉遺言
幾年竟墜蹉跎計
萬里徒勞慘澹魂
客裏可堪逢忌日
夢中却得見生存
連夜夢見先
君如平生
遙知今夜佳兒女
哭斷寒雲靜掩門

為劉郎中壽

翠羽同舟共陸沉
蕭條江館歲華深
艱危愈識斷金義
險阻尤存底柱心
表裏亭邊今昔事
雲門山下短長吟
幾時拂拭塵埃了
尊酒盟寒却重尋

鏡鄉亭

薄薄輕雲似霧塵
陰陰江氣冷侵人
一庭芳草留連客
兩樹天桃斷送春
檻外流鶯仍語巧
梁間旅燕又巢新
東城飲伴西湖柳
寒食中間入夢頻

望金陵

雲際參差是石頭
天浮斜日雁橫秋
誰將故國千年限
都付長江萬古流
破屋殘城未埋骨
焦頭爛額盡封侯
不逢四海為家日
獨立蒼茫漫起愁

贈都事苟正甫

接屋連牆受學初
斬斬頭角氣凌虛
將鬚便敢刺雙虎
回首還看總一猪
未鬻子卿羶上雪
且傳黃霸獄中書
天教三士從重耳
返國尊王儘有餘

甲子秋懷

江館無家久似家
西風院落老天涯
黃纏薯蕷猶多葉
綠擁芙蓉尚未花
紗幕墜塵歸晚燕
窗池生草產秋蛙
枯腸欲斷誰濡沫
擊柝聲中夜煮茶

秋晚後園獨步

孤館年深草自荒
愁來無語立斜陽
裂冠毀冕霜雞紫
接屋連牆露菊黃
仰視飛鴻腸欲斷
佇聞靈鵲恨尤長
中原萬里家何在
江氣霏霏水潑裳

壽劉詳議

坐數年華更覺頻今年猶在大江濱却秦但惜侯嬴老
反晉全馮舅犯親把酒相看如夢寐圍碁正急羨精神
丹心不誤蒼生累黑井從渠白髮新

晚步

持節寧知墮甌空政當竭力効公忠鬚毛變白烏元黑
頭角尤高馬自童日月麗天常轉北江河宗海必朝東
下帷講誦朝還夕玉振金聲道不窮

贈魏武

我解屠龍推第一君能射虎說無雙
乾坤磊落心何愧歲月蹉跎義不降
白刃斬祛離舊館黑風吹血破寒江
競將康瓠欺神鼎正賴孤忠力與杠

戊辰新館守歲贈正甫書狀

坐上春回北斗邊梅花驚落燭花前
六人同出今三歲一夕相看是十年
行入玉門持漢節却朝金闕見唐天
不須更作楚囚泣歸馬東風快着鞭

勉孔進學

萬卷撐腸是丈夫，豈宜冠玉作庸愚。
學書使得吾家法，開卷願為君子儒。
十載甘心作蘇武，九齡誰意得童烏。
天將男子屠龍技，著力須探領下珠。

己巳三月二十六日二首

春來渾不見花枝，春去蕭條總不知。
有酒四時難有興，無情三月竟無詩。
歸鴻恨別排雲遠，雙燕嫌孤入戶遲。
江渴風高還欲斷，魚龍宛轉亦堪悲。

夢遊故國人仍獨春到空梁燕自雙雲淡星疎祇見斗
浪平風定不聞江五更鼓角纏孤枕千里關河入破牕
落盡好花春又老依然塵土暗金杠

庚午夏至夜雨

至日元陽霖甲子中宵陰氣一何豪龍蛇起陸乾坤黑
風雨翻江鼓角高病骨濕侵寒似水冤腸恨入毒如刀
幾回坐起推牀語白地南來坐鐵牢

壽正甫書狀

歲晚途窮漢節遙秋高江濶尉佗驕銀潢雁度五更月

赤岸鯨吹半夜潮世路從來多梗塞雲天無日不風颭

艱危正要胸襟豁磊砢

同

須將斗酒澆

杜少陵王宰山水圖歌赤岸水

與銀河通赤岸在瓜步山東南連皇天蕩海濤入江衝

激六七百里金陵之至險也在儀真西南故有銀潢赤

岸之

句

江城兀坐聽秋聲菱殺西風鴈背輕一紀乃能同患難

數杯聊復慰生平新書總付徐無黨半臂誰添宋子京

昨夜太行還入夢倚天青碧大河橫

時余改修三國志正甫為余集註故

有徐無黨宋
子京之句

陵川集卷十三

謹案十一卷第十一頁前七行郭哈瑪爾舊作郭蝦蟆

今改後倣此

十二頁前一行伊勒都舊作移刺都

今改後倣此

十三頁後二行哈達舊作合丹

今改後倣此

十三頁後四行布色舊作白撒

今改

十四頁前四行陳華善舊作陳和尚今

改

十四頁後二行茂竒爾舊作邈吉烈今改

十四頁後四行烏克遜舊作烏古孫今改



總校官候補中書臣吳紹深
校對官中書臣吳裕德
謄錄監生臣湯師錫

欽定四庫全書薈要

集部

陵川集卷十四

五



臣董誥詳校
詳校官助教臣謝登雋

欽定四庫全書薈要卷一萬六千一百三十

集部

陵川集卷十四

元 郝經 撰

律詩

升賢村二首

棗栗荒山脚懸崖石作牆
共言長樂老此是讀書莊
五季乾坤黑三綱道義亡
誰云不直死更請問歐陽
兩嶺青林夾孤山黑石圍
雲攜疎雨過風約斷虹飛
為

告奸雄叟難逃筆削譏荒村好終老白首竟忘歸

張燕公讀書臺

石窟煙龕黑懸崖隱斷碑崢嶸大手筆突兀小須彌天
入無邊闊山臨欲盡危祇應秉釣日憶得讀書時

寓感二首

天運不可測人心空自疑茅廬與耕釣遭遇亦其時火
鼠能為布冰蠶自吐絲區區路傍馬笑殺抱關兒

前途如暗室長夜老乾坤怪字書衾裂繁雲蔽月昏悠

悠心曷展落落志仍存
反側不成寐西風葉打門

過友人故居

不見青雲士唯餘數畝宮
斷牆藜藿滿破屋子孫窮肝
膽交游在文章事業空舊時
同坐榻閒卧夕陽中

送王國範北上

一別恒陽下雲霄忽羽儀
耻為州郡屈直結帝王知
歲月不我與河山空自竒
黃塵愧先達感慨入新詩

送宋和甫從軍

北陸開新運爭依日月光一時乘變化萬里快騰驤碧海轉鯨背青雲列鴈行春風吹錦浪好去看三湘

下泰山題真君觀壁

黃峴趨迴馬州人競捧觴忽驚天上夢猶帶日邊光絕頂秦碑裂陰崖漢柏香行行重回首瞻仰意難忘

開平新宮五十韻

日月旋天蓋星辰合斗樞光騰掌內鐵氣繞澤中蒲金帛羞重賜弓刀奮一呼真人翔灞上天馬出余吾尺箠

初開闢羣雄競走趨無勞為更舉乘勝即長驅蹴踏千

年雪驍騰萬里駒長城衝忽斷弱水飲先枯肅殺威靈

盛驅除運會俱華夷塵瀕洞天地血模糊地盡諸蕃外

兵窮兩海隅九州皆瓦礫萬國一榛蕪誰與重休息徒

為妄駭吁治平須化日殺伐豈良圖聖子曾當璧神孫

會握符鐵山深蘊玉瀚海特生珠歷數終當在謳歌信

不誣欲成仁義俗先定帝王都畿甸臨中國河山擁輿

區燕雲雄地勢遼碣壯天衢峻嶺蟠沙磧重門限扼狐

侵淫冠帶近參錯土風殊翠擁和龍柳黃飛盛樂榆歧

山鳴鸞鶩翼野牧駒駝風入松杉勁霜涵水草腴穹廬

罷遷徙區脫省勤劬階土導堯典卑宮協禹謨既能避

風雨何用飾金朱棟宇雄新造城隍乞力扶建瓴增壯

觀定鼎見規模五讓登皇極羣生賜大酺還聞却走馬

即見弛威弧簡策詢前代弓旌聘老儒恢弘回一氣徼

倖絕多途雷雨施龐澤乾坤洗舊汙直為提赤子遂使

出洪鑪遠檄收疲繭

音你

窮邊罷轉輸江壩遺鄂岳石窟

棄巴渝刀槩存殘骨膏粱換毒痛却令逢有道免使叫
無辜契濶還同室鰥惻得字孤八荒皆壽域六合極歡
娛白叟休垂泣蒼生獲再蘇只知期用夏更擬論平吳
旭日冰天透仁君雪國無終能到周漢亦足致唐虞遇
主得知已逢時合捨軀弭兵通信誓奉詔敢踟躕頓覺
心田豁還將肝紙剗行行重回首瑞氣滿闔閭

不寐

夜久不成寐蒼茫自詠詩客懷三月老春信野梅遲喜

子垂牕隙燈花落硯池祇應有行色失語問何時

春夜

春雨江湖夜東風花柳寒舉頭不見日何處是長安歲
月纏星節乾坤遠血盤控拳紛愈甚排難古來難

儀真館中暑一百韻

五載淹江館三年錯雨暘熱中蒸滯氣洄輒斷枯腸黑
井鹽煎火紅爐鐵鍊鋼悵懔加誕罔坎窗觸機張直壯
無身慊窮堅著命當鼻煙從燎炬溝汗盡翻漿噎塞難

通七摧頽懶揭裳沾濡粘弊屣毒螫上空牀甌擁輪囷
肉瓶熬膏沸湯噉喘氣尤偃呌吼怒如狂曉瘴煤生柱
晴霾土抹墻片雲遮日薄疎雨灑晴忙熒惑凝青血長
庚迸赤芒槁天高破碎乾月死昏黃翕煬渾無露萎焦
似有霜燕呀棲不壘鳶跼音墮難翔雷殷轟蚊塔沙生
閭蛾槍飛螢空自燭戰蟻竟深藏盤礴摧腰脊低垂塌
目眊本來觀化日誰使遇愆陽風土間南國江山異朔
方豈期惟酷烈無處別炎涼故國包全晉吾家壓太行

高寒雄地勢瀟灑靜雲莊六月衣冠冷千年草木香長
松撼潮海絕壁隱虛堂却到燕山北行歌易水傍鴈霜
凋夏木鳩雨潤春桑聘幣輝光重徵車道路長沙陀瞻
帝里雪谷拜天王的皦星街凍嚴凝日隱光羣雄奮永
窟六合入壇囊半世無蒸濕于今重禍殃襟裾堆蚤虱
肘腋沸蜩蟬豈免泥塗辱還令羽翮戕甘言雖未已毒
手益難量夾柵仍規覘重圍更限防塹門深虎圈擊柝
開魚榔箱逼鑪錘密枝梧觜吻荒釜鬻烹則易刀俎食

非強氣數俱臻極天人盡反常旱灾綿歲月禍本入膏
肓重怒非長策佳兵甚不祥擲揄肆巖阻鄙外極戎羌
信誓猶然在明徵固未妨但令心匪石儘自口如簧喟
歎愁仍積吁嗟氣不揚行人竟何罪國體豈無傷反已
私尤責知微實愧惶逢時當際會援溺止懷襄自縛懸
難解輸人律否臧恧心煨肺腹畏景急炮塘欲掘陰山
鼠翻思雪窖羊履危從蹇剋挺節不低昂伊昔當崇慶
金源復靖康白虹纏帝座紫電激天狼傳說騎箕尾王

良策駟房一龍轟霹靂萬馬快騰驤歷塊無完國蜚鋒

舉斷吭纔聞過燕趙又已出河湟此際通和好惟時正

擾攘渾如沃薪火大似堰流糠狼藉三峯敗顛連五國

亡濟師攻汴蔡徽節到餘杭海上盟空濶城南事渺茫

劍關開要害淮海失城隍寓縣餘骸骨乾坤一痛瘡百

年血肉運萬里戰爭場邊將徵功賞兵人藉糗糧居然

忘厄會但請復侵疆虎怒寧須激鯨吞更請嘗肌膚坐

銷鑠節鉞漫焚煌破屋渾生亂

音亂

方畦孰插秧薜蘿無沒

洲渚潢潦漫陂塘莽蒼人何在陰森鬼正張
雁兵秋滾滾魚窟夜遑遑豈忍仍擠石無為更藥瘍
橈槍闌三紀絲枲紊千箱已亂仁明出中興祚胤昌
勝殘須必世奕葉始呈芳秦府鳳鱗質周家金玉相
河山收殺氣雲漢煥文章
潜邸人皆仰春宮德益彰厭兵符太母歸馬勸
先皇禮樂尊周孔聲名慕漢唐恢弘張治具突兀振乾
綱駿發輪平急鋪敷大命將奉書祗局脊馳驛敢彷徨
加額人皆賀摩肩衆所望只今全父子無復痛孤孀延

入拘營壘周羅匝廡廊只將人桎梏不用鐵銀鐺龍節
埋泥甯孤涎汨土甌焚身無取齒避竈豈爭煬炎赫惟
加熾風颺不許涼祗愁化灰燼何處薦珪璋天問終無
語冥搜未易詳艱屯果誰敢壞亂實難匡有賦誇鸚鵡
無媒獻驢驢何當快風雨吹去卧滄浪

二月二十三日猶在儀真館三首

向晚日華紫殷然轟夜雷龍蛇開蟄窟桃李動春臺淚
逐催花雨心同潑火灰何由復龍動百感坐中來

一年淹使節二月駭春雷瘴入江心黑雲銜雨腳灰社
心還激烈滯氣忽騫開明日誰聊賴鶯花故惱來

二月還如夏炎蒸鬱震驚迅霆侵骨冷飛電透心明海

氣霑衾濕江聲拍枕平從今休禁火一雨萬家生

是月初二

日火二十日丑刻火午刻復火一月凡三
火獨遺舍館及漕臺州治在故有是句

月夜感懷

去國期星歲無家阻萬金江山沉苦思花月動哀吟變
故空長策蹉跎惜此心遙憐燈火罷兒女夜愁深

江暑

地軸風濤浸吳門江海流四時長似夏一雨便成秋
煙潤青紗幕香濛白氎裘燕山猶避暑今日向江頭

壽何待制

歲月閒丹竈乾坤坐白頭幾回看北斗何日見西
周盤谷蘭花老天壇桂葉稠會當逃世網共與赤松遊

雨中感懷

舍館年年老江邊日日陰雨聲便熟睡花氣動幽吟樹

密鶯愁濕庭荒雀畏深晚風吹鼓角慙愧弭兵心

薄暮二首

薄暮秋雲合江聲靜裏來無聊空徙倚失志重徘徊細
雨金桃落踈煙玉鳳開相看如夢寐觸物總傷懷
棘柵今年改庭隅展半陰草依斜徑短苔入後牆深歲
遠人空老時危事益沉頻頻問烏鵲何日有佳音

曉起

傍枕衾裯薄還家夢亦難月華終夜白江氣先秋寒心

苦天為碎辭窮海欲乾
起來看北斗何日見長安

聖節

六年瞻北闕八月拜西風
冰雪天王聖河山帝業雄
但令旄節在馬問酒樽空
屬國歸何晚浮江有阿童

壽劉詳議

甲子數盈亥神強志不衰
共知憐絳老誰與問鍾儀
萍梗三朝夢乾坤兩鬢絲
得年萬事足爛醉復何辭

江雲

江雲似江水渺渺復粼粼
晝靄無窮態紆餘不盡春
遮回斷行雁望殺未歸人
何日星軺路馮高更憶親

新館感春四首

東風吹散褐水氣撲虛簷
月窟星河落江城鼓角嚴
年深愁不醒春至恨猶添
為問秦通守何顏說錦簾

行李金昏節腰圍玉擲韉
居然隔天日不許出門庭
歲月侵雙鬢乾坤誤六經
誰邊覓春色牆上草還青

佇立無人語巡簷思慘然
夜江寒浸月春樹暝生煙
計

拙仍持節途窮擬問天難為繞指鐵萬折志彌堅
憶昔清明際昏昏醉裏身吟魂半牕月花影一簾春豈
意傷心別空勞入夢頻漫聞烏與鵲悵望幾迴嗔

丁卯夏六月大雨震電

雨連江表黑電入海東紅川瀆翻冥漲乾坤破猛風忽
開金碧界幻出水晶宮我欲乘時去長歌向北中

八月九日甲子夜雨

久旱雨亦好還霖甲子秋陰森當月黑黯黯作天愁北

海涵疑落西風浩不收凜然寒入骨鄉思滿牀頭

九月五日念母

思子甚思母祇應淚更多尚無歸國日其奈倚門何江
漢悲溫嶠詩書愧孟軻今朝誰獻壽庭戶可張羅

戊辰寒食

今歲明寒食梨花月正圓客愁催我老春色向人偏強
飲稽留酒難辭簇送筵杜鵑休浪語歸去更何年

贈魏斌

熊虎無堅對風雲滿義襟每將孤劍說但惜二毛侵貫
日臨危節曉天討賊心中原有期運莫畏歲華深

傳易有感

故國山河表中原斗極邊稽留深失計還反竟何年風
雨纏孤劍塵埃委斷編漫窮西伯易誰好子雲玄

壽正甫書狀往歲正甫壽予以詩今歲復用其
韻以壽之

繾綣心尤壯崔嵬志不遷雖云窵土窄猶有片天圓吾

道艱危久君才賦予偏抗秦完白壁禦寇寇青瑣遂使
干旄在終當斗印懸物窮寧不返期逝未為愆在我都
無愧從渠遂弗悛風雲纏怒虎霹靂墮寒蟬真玉干燒
冷渾金百折堅十年仍齧雪一念久通天莫信枉能直
誰言典則全會將垂領抉還把怒鬚編得失兩端了安
危一著先冥區初因象陸海本忘筌日月圓機轉乾坤
大器埏音屈伸成變化來往共回旋困極難移石潛深
可脫淵九原驚奮迅八表會飛騫蘇武終歸漢田疇不

負燕河山生喜色戲綵舊堂前

新館夜聞杜鵑二首

啼落深江月催殘故國春不堪多恨鳥偏聒未歸人血
盡腸應斷哀餘聲更頻關心尤入耳一枕夜愁新
久客難勝感那間泣血禽乾坤心緒苦歲月鬢毛深亡
國元多恨催春漫好音館人將赭樹何處沒青林

壬申二月四日二首

庭雨滋春草江煙濕落梅病多剛斷酒席合亦持杯氣

數冥難測乾坤莽不迴還看仍焰焰未肯著寒灰
戍鼓晚來急春潮夜有聲燭花侵坐落梅影上窗橫小
酌歡尤洽孤吟興愈清最憐星散後一枕故山情

病中即事

久客難堪病衰顏倍覺秋空杯仍自舉墮甌復何求兩
度交金火連年犯斗牛道窮還遇此安得見西周

十二月十七日大風雪

海立陰風黑冰牀報雪威紛披平地袞攪擾半天飛胸

隙楊花亂簷前穀穗肥還間八千騎飽肉飲江歸

俗謂水穎

為水牀有則有大雪又謂簷前水柱為穀穗長大則豐年之祥也

癸酉閏六月十三日夜病中間笛二首

深夜涼風發迢遙送笛聲只愁江月破不放野雲行
怨曲人多感離腸恨易生病中催坐起傾側若為情

斷續誰家笛噫鳴入耳偏燕山記疇昔江館是何年
餘響星河外羈魂月露邊那堪更三弄老淚已如泉

陵川集卷十四